



Ina pergola ch'unescha

Diesch commembers dall'Uniun da giuventetgna Surrein han construiu dacuort ina pergola ensemen cun siat giuvenils e quater menaders dalla Casa Prisma a Trun. Ils cuosts per la pergola ha l'Uniun da giuventetgna surpriu ed aschia fatg in bi regal allas habitontas ed als habitonts dalla Casa Prisma che s'auda alla Casa Depuoz.

Susi Rothmund/FMR

L'Uniun da giuventetgna ha vuliu sustener ina buna caussa e mess a disposiziun 2000 francs. Aschia han *Andrina Giger* ed *Annalea Candinas* giu l'idea da sustener giuvenils dalla Casa Depuoz. «Ei dueva esser in regal persistent e buc semplamein in'excursiun dad enzacontas uras e tut fuss stau vargau», declara Andrina Giger, ina commembra dall'Uniun da giuventetgna Surrein.

Aschia han ella ed Annalea Candinas contactau ils responsabels dalla Casa Depuoz ed igl ei vegniu alla glisch, ch'ils giuvenils che vivan cul support dalla Casa Depuoz ella Casa Prisma, havessen bugen ina pergola per aschia saver passentar dapli temps communabel ordaviert.

Maun en maun

«Aschia essen nus sedecidi da finanziar il material per la pergola e da construir quella ensemen culs giuvenils dalla Casa Depuoz, quei cuagl intent da realisar in project persistent communabel», declara Andrina Giger.

Ils 13 d'uost ei la pergola, planisada da *Sandro Maissen*, vegnida construida. «Ils giuvens han construiu e nus giuvnas havein preparau gentar ed alla fin dalla lavur havein aunc gudiu ensemen in aperitiv en cumpignia simpatica», raquenta Andrina Giger ed aschunta: «Igl ei stau in bi e divertent di, ils giuvens han luvrau a moda nuncumplacada, cun motivaziun e maun en maun e tuts han gudiu la cuminonza ed astgau far ina bun'experientscha. Noss'acziun ei vegnida apprezziada fetg e quei ei bi per nus sco uniun.»